

Анафора двенадцати апостолов

Достойно и праведно Тя пети, Тя благословити, с Единородным Твоим Сыном и Святым Духом: Ты от небытия в бытие нас привел еси, и отпадшья возставил еси паки, и не отступил еси вся творя, дондеже нас на небо возвел еси, и Царство Твое даровал еси будущее. О сих всех благодарим Тя, Тя и Единороднаго Твоего Сына и Святаго Духа.

Тебе предстоят окрест Херувими, четыре лица имущии, и Серафими - шесть крил, хвалу величия немолчными устами и непрестанными гласы со всеми небесными силами славяще и поюще и взывающе и глаголюще: Свят, Свят, Свят, Господь Саваоф. Небеса и земля полны славы Твоея. Осанна в вышних. Благословен Грядый во имя Господне. Осанна в вышних.

Свят еси и пресвят с Единородным Твоим Сыном и Святым Духом. Свят еси и пресвят в величии славы Твоея, Иже тако мир возлюбил еси, якоже Сына Твоего Единороднаго дал еси, да всяк веруяй в Него не погибнет, но имать живот вечный: Иже пришед, и все еже о нас смотрение исполнив, в ночь, в нюже предашеся, приемь хлеб во Своя руки и воздвиг я к небеси и благословив, освятив, преломив, даде святым Своим учеником и апостолом, рек: Приимите, ядите от него вси вы, сие есть Тело Мое, еже за вы и за многия ломимое и даваемое во оставление грехов и в жизнь вечную. Подобне и чашу по вечери, растворив от вина и воды, благодарив, благословив, освятив и вкусив от нея, даде учеником Своим и апостолом, рек: Пийте от нея вы вси, сие есть кровь Новаго Завета, яже за вы и за многия изливаемая и даемая во оставление грехов и в жизнь вечную. Сие творите в Мое воспоминание. Елижды бо аще ясте хлеб сей и чашу пиете, смерть Мою возвещаете и воскресение Мое исповедаете, дондеже прииду.

Поминаюше убо, Владыко, спасительное изволение всего домостроительства Твоего, еже о нас бывшее: крест, тридневное из мертвых воскресение, на небеса восхождение и седение одесную величества Отца и второе славное Твое пришествие егда приидеши со славою судити живым и мертвым и воздати всем человеком по делом их с человеколюбием, Церковь Твоя и стадо Твое молит чрез Тебе и с Тобою, глаголя Отцу Твоему: помилуй мя. И мы, Господи, приемлющии милость приносим Тебе благодарение за вся и по всему.

Посему просим Тя, всемогущий Господи и Боже святых сил, простирающеся ниц пред Тобою, низпосли Духа Твоего Святаго на предлежащии приношения. И покажи хлеб сей честное Тело Господа нашего Иисуса Христа. И чашу сию Кровь Господа нашего Иисуса Христа. Якоже быти всем причащающимся от них в жизнь и воскресение, и оставление грехов и исцеление души и тела, и просвещение разума и в надежду на страшнем суде Христа Твоего. И да никтоже от народа Твоего отпадет, соделай ны, Господи, достойны безмятежно послужити Тебе, да пребывая в служении Тебе вся дни живота нашего, насладимся Твоих небесных, вечных и животворящих Таинств ради милости Твоей, Твоего милосердия и человеколюбия ныне, и присно и во веки веков.